

CULTURA DE PADENTE... E DE TZITTADE

Pastores de oje
ponent fatu a sa gama
cun passu anticu.

Boes e caddos
e molentes
ant cambiadu
cun berturas e tratores.

In s'intragna 'e s'anima
bardant galu como
sa leze 'e su padente.

Berturas e tratores
e lampos de raios
sunt trastos de cultura istranza.

Poetas nobos
cantant amore e pache
preicande un'ateru banzeliu
chi non s'aperit aghidu
in coros de crastos
in ulicras surdas
in tancas de odiu
in bidditzolos de rancore
inserrados.

Inzenios nobos
non cambiant
mentalidade antica
a chie
at pro iscola su tzilleri.

Libros de sientzia
non paschent
in tancas de animas cunfinadas
in pastura desertas
in passibales de ismenticu.

Omines de pinna nobos
non brinchiant cresura
e muros
de cussorjas serradas
in fozos de papiru iscritu.

Iscrivent
e s'iscritura issoro
est petzi disaogu
de dissipulos e collegas.
E mantenen fora
pastores e massajos
chi non comprendent tzafu
de su cantare issoro.

Sichit su pastore
sa cantilena
de s'andalibeni
dae bidda a campu
presoneri de cultura
istasia
in seculos de istoria.

In s'ampraria de su chelu
unu matessi sole
luchet a duos mundos
chi non si jobiant galu.